

Tutu é kuvi ūvi e táxnū San Pablu iña ñá ñuú Corintu

Taxnū Pablu tú'un iña ña kuínti'xe i, ñá ntoo ñuú Corintu

1 Xu'u é Pablú u ne, pustrú u iña Jesúcristu, tsí kuān o e ntío Xuva kō. Ntúví u ení ko Tímoteu táxnū ntí tutú sa'á iña ña kuínti'xe i Xuva kō, ña ntánataká nuu ini ukun ñuú Corintu, ni un ntíí ntíí ña ntáduku ntée Xuva ko da kaníi ñuú Acaya. ²Na naxnuu viko Xuva ko ntō. Na tā'xi ña é kuntōo vá'a nto, divi ña nī Tó'o ko Jesúcristu.

Nté ō ntó'o Pablu

³Ká'an o ni Xuva ko, uvā Tó'o ko Jesúcristu, tsi dóo va'á ña. Tsi divi ña é uva ko ña e dóo kantunta'ví ini ña kō, é kanatsu'un ka'nu ña iní kō é ví'a é uten. ⁴Xuva kō ne, kanatsu'un ka'nu ña iní ko da nēé ka nuu i e ntánto'o kō vata koo é kúvi natsu'un ka'nu o iní ta'an ko, ña e ntánto'o i dí, vata tsí ó de Xuva ko ni kō. ⁵Tsí kuān te dóo ntánto'o ntí kuenta iña i e ntántikín ntí Cristú ne, ntá tsi divi tsi ña dóo kanatsu'un ka'nu ña iní ntí dí. ⁶Tē ntánto'o ntí ne, ntánto'o ntí vata koo é nāku'un ka'nu iní nto, vata koo é nākáku nto. É nátsu'un ka'nu

Xuva kō iní ntí vata koo é nātsu'un ka'nu ntí iní nto dí vata koo é kutíi nto é nto'o nto vatā o ntánto'o ntí. ⁷Dōó ka'nu kuiní ntí ni ntō tsí iní ntí tsí te kuān o ntánto'o nto vatā o ntánto'o ntí ne, kuan tsí ó kanatsu'un ka'nu Xuva ko iní ntó vata tsí ó de ña nī ntí.

⁸Ntio ntí é kūtuni ntó, ta'an ko, nté ō ntó'o ntí ñuú Asia. Un vá'a tsi ntó'o ntí íkān. Dókō sá ña ni kutíi ntí. Tsi kúví ntí, kuiní ntí. ⁹Ntá tsi kutuní ntí tsí da mií é kúví ntí, vata koo é kūtuní ntí tsí ña te mií ntí ió ntí é víí ntí, tsí Xuva kō é iō ña é víí ña, tsí divi ña é kanantōto ña ña xi'i. ¹⁰É nakākú Xuva kō ntí di'na dá dokó sa nī xi'í ntí ne, kuān koo víí xtúkú ña. Iní ntí tsí nakāku xtúku ña ntí tē xeé doxi'i e dóo ntii ini í, ¹¹te divi nto xntii ntō ntí é ká'an ntá'ví nto kuenta iñá ntí. Te títín ña'a ka'an ntá'ví ña iñá ntí ne, títín ña'a naku'é ña sintiá'vi nta'a Xuva kō tsi ni'í ko é vá'á nta'a ña.

Nté kui ña ni ñé'e Pablu ñuú Corintu

¹²Ío uun nuu i e dóo ka'nu kuiní ntí: tsi ñá te nēé kuetsí ntí tsí ña ni idé ntí nuu i é kīni kaa ñuxiví sa. Tsi dé ntaá ntí é ká'an ntí ni ntō

é nuu é ntaā i. Tsi da xe dóo va'á Xuva kō né, xntii ñā nti é kuān o dé nti, tsí ñā kúvi víi nti nuu i é vā'á tē dí ñā Xuva kō kaxntíi ñā nti. ¹³Dā ntátaxnūu ntí tutú nta'a nto ne, ñā te tū'un e dóo xū'u ntáka'án nti ni ntō, tsi ntāñe'e ñā nti ntō, tsi ntáka'án nti. Ntio ko é na kī'in ñā nti ntō, ¹⁴vata o kue'en ñā kúdi nti un siin e ntáka'án nti ni ntō, vata koo é ka'nu kuini ntó kuenta iñā nti ne, ka'nu kuini nti kuenta iñā ntó ñā, tē xee ntúvi é nainu xtúku Tó'lo ko Jēsuu.

¹⁵Tsí iní u sá'ā ne, ñā mí ntoo nto kī'in u kíkoto ni'ni ú nto, kuini kó, vata koo e dóo ñā nti nti uvi íto é kōto ni'ni ú nto. ¹⁶Tsi ntío ko é kuīta ntí'xin u mí ntoo nto te kuē'én u itsi ñūú Macedoniá ne, te kuīta ntí'xin xtúku ú da xkókoo ú, vata koo é xntii ntō kó te kuē'en xtúku ú itsi ñūú Judea. ¹⁷¿Ñā vā'a ntū ó ni dē kuení ko, te kuini nti? ¿Ntákuinti'xe ntu nto te dotō tsí kaxé'le ú xu'u ko é víi u, o tē ñā víi u, vata tsí ó de ñā é ñā ntántikin Xúva kō? ¹⁸Kutuni Xúva kō tsí nuu é ntaā i é káka'án nti ni ntō, ñā te dotō tsí kaka'án nti. ¹⁹Ntuní nti Silvanu ni Timóteú ne, ntáka'an ntódo ntí ni nto ñā Jesúcristu, I'xá Xuva kō. Divi ñā ne, kaka'an ñā é nuu é ntaā i, ñā te dotō tsí kaka'an ñā. ²⁰Tsí divi ñā ne, dē ntaa ntí'í ñā é un ntí'í e tá'xi Xúva kō xu'u ñā. Dukuān ne, ntáka'an o “Kuan tsí koo na kōo” da ntáka'an o tsí dóo ka'nu Xuva kō. ²¹Xuva kō ne, é tā'xi ñā é kuve ta'an kútu o Cristu. Mii ñā náka'án ñā kō. ²²É xntēé na'a ñā ko vata koo é kūtuni ko tsí ntáduku ntēe o ñā. Tsi tá'xi ñā

Espíritū Sántū san é kunūu ñā nima ko vata kaa uun káa é ntēé na'a nima ko.

²³Ntá tsi ñā ni nákuita nti'xin ú ñūú Corintu vatá ó kaka'án u, tsí ñā ni ntío ko é kuntōo ntá'xa nto kuenta iñā ko. Ini Xúva kō tsí nuu é ntaā i. ²⁴Tsi ñā te ntí'í ntáde kúlvé nti nté koo kuinti'xe nto Xuva kō, tsi é úve tá'an kutu nto ñā. Ntá tsi ntio ntí xntii ntí nto e díí díí ka kuntōo díní nto nta'a Xuva kō.

2 Dukuān ne, ñā ni ntío kó kī'in xtúku u kíkoto ni'ni ú nto tē dóo kuntōo nta'xa nto. ²Tsí te xū'ú vii u é kuntōo nta'xa nto ne, ¿xóo ntu vii i é nakunuu díní nimá ko, tē ñā ñā nti? ³Dukuān e táxnūu ntí tutú san iñā nto, vata koo é ñā kutuví nta'xa ú kuenta iñā nto te xee ú mí ntoo nto, tsí ntio kó kutūvi díní u kuenta iñā nto. Tsí te kutūvi díní u ne, dadíi kūntoo díní ó ni ntō. ⁴Dā dé va'á u tutú san ne, dōo dé kuení ko, dōo ntí'í iní ko. Un tsi nte éku u. Ntá tsi ñā ni de vā'á u tutú san é na kūntoo nta'xa nto, tsí vata koo é kūtuni nto tsí ñā te nté kaa kuinimá ko nto.

É káda ka'nu iní ñā nī ñā edé kīni kaa

⁵Ntá tsi te ūun ñā'a dé ñā é kutuví nta'xa ú ne, ñā te mií tsú kutuví nta'xa u, tsí iō ntó é kūntoo nta'xa nto kuénta iñā i é edé ñā ñā. Ká'án u tsi “iō ntó” vata koo é ñā ká'án u te un ntí'í ntō. ⁶E xéé o tsi é nantō'o nto ñā, dókō sá un ntí'í nti nti. ⁷Vevíí ne, díí ka vā'á ó te káda ka'nu iní nto ni ñā, te náxnūu ka'nu nto iní ñā vata koo é ñā kutuví kue'en ñā dontíni. ⁸Dukuān

ne, kaikán u nta'a nto te kuē'é nto é kūtuni ña tsí ntio nto ña. ⁹Di'na táxnūu ú tutú kuenta iña núu i sá'a é kōto ntee ú nto te kāda ntaa nto é un ntí'í é kā'án u ni ntō. ¹⁰Da xōó ka ña'a é kāda ka'nu iní nto ni ñā ne, kada ka'nu iní u ni ñā dī. Da nēé ka nuu i é dé ka'nu iní u ni ñā'a nuú Cristú ne, dē ka'nu iní u ni ña kuēnta iña nto, ¹¹vata koo é ña kuvi vii é ña vá'a san ni ko. Tsí ini vá'a ó nté xkoó de.

Dōo ntí'í iní Pablu ñuú Troa

¹²Dā xeé u ñuú Troa é kā'an ntódō ú kuenta iñā Cristú ne, dōo vá'a ni'í itsi é kada tsiñu ú iña Tó'o kō. ¹³Ntá tsi ña díní nuu nimá ko, tsí ña ni naní'í ko ta'an kō Tito. Dukuān ne, nakué'e ú ña ntoo ikān doka'nú iní ne, dá kuē'én u ñuú Macedonia.

É kaxé'e Xuva kō é kūvi vií ña

¹⁴Ntá tsi ntadiá'vi Xuva kō tsí nguentúvi kata'xi ña é kūvi vií ntí, tsi kúvi dé Cristú ne, ntántikín ntí ña. Dā mí'í ka ntāñe'é ntí ne, ntaíní'í ntí tú'un iña ña vata koo é kūtuni ñá'a xoo ñá'a é divi ñā. Dukuān ó kaika tú'un iña ña dá kaníi ñūxiví sa, vatā ó kaika diko i e dóo vá'a ñe'e. ¹⁵Ntí'í ne, vata kaa díkō kutu é kaxé'e Cristu ntá'a Xuva kō ntáa ntí, uun díkō i é kaika mé'ñū ña ntánakáku san nī ña ntákunaá san. ¹⁶Dā iní ña ntákunaá san ne, kutuni ña é nī'í ña dóxi'í. Dā iní ña ntánakáku sán ne, kutuni ña é nī'í ña ntuvi iña ña. ¿Xoó ntu kuvi vií i nuu i sá'a? Mii tsi Xuva ko tā'xi ña é kūvi vií ntí. ¹⁷Ntí'í ne, ñā tē ntaíka ntí ntádikō ntí tú'un Xuva ko vatā ó de ña

nguii. Ñā tē ntánadama ntí tú'un ñā, tsi ntáka'an ntaá ntí tú'un Xuva kō, ñā tē ntaéni nta'ví ntí ña'a. Tsí mii Xuva kō táxnūu ña ntí ne, é kúve ta'an ntí nī Cristu.

Tū'un xee é naxtúví Xuva kō

3 ¿Ó ntádē kuení ntu nto tē ntáka'an xtúku ntí ni ntō tsi dóo va'á ntí? ¿Ó ntio ntu nto é kuído ntí tutú sa xeé ntí mí ntoo nto vata koo é kūtuni nto xoó ña'a ntí? ¿Ó kantio ntu é kākán ntí nto tutú sa, vatā ó de tuku ña'a? ²¿Ñā'á ni san! tsí divi ntō e kúvi nto tutú san é ni'í ntí. Tsí divi ntō ne, vata kaa uun tutu é ntēé na'a nimá ntí é kīni un ntí'í ntí'í ña'a san, nakua'a ña. ³Tsí nto'ó ne, vata kaa uun tutu é de vá'a Cristu é nī'í ntí. Ñā te tīnta ni xé'le, tsí Espíritu Xuva kō, ña kantíto ntii dañu ntūvi. Ñā te āta xúu ni kanteé na'a, tsí nima ñá'a san é kānteé na'a.

⁴Dōo ntaíntee ini ntí Xuva ko kuēnta iñā Cristu. ⁵Tsí ña te míf xntí iní ntí nté koo vií ntí, tsí nee iña é ncho vií ntí ne, vé'xi nta'a Xuva kō. ⁶Divi ña nañ'e ñā ntí nté koo vií ntí tsiñu kuenta iña tú'un xeé san e xtúvi ña. Tū'un xeé san ne, ñā te tū'un é ntēé na'a é kada ntaa o vatā ó lei Muísee, tsí ntuvi iña ko é vē'xí nta'a Espíritū Sántū. Tsi tú'un é ntēé na'á san ne, kaka'an tsí ni'í ko dóxi'í san tē ña ni de ntáa o, ntá tsi Espíritū Sántū sán ne, kata'xi ña ntuvi vā'á iña ko.

⁷Tū'un e xtúvi Xuva kō kídaā ne, áta xūu tsí kanteé na'a. Ntá tsi un tsi kaxi'í nuu ka'nu nuu Muísee da kí'í ña tú'un san. Ntē ña ni kutí ña Israeé san koto ña nuu ña, tsi dóo

kaxi'í nuu. Ntá tsi da kuí'í da kuí'í tsi kanta'va ntúve i san. Te kuān o xi'í nuu ka'nu da xée tú'ūn é nī'i kó doxi'í san ne, ⁸ ¿nté ntu kaa dí'í dí'í ka'nu tú'ūn e tá'xi Espíritū Sántū san? ⁹ Tē dóo ka'nu kúvi dá xee lei é nī'i kó doxi'í ne, dí'í dí'í ka ka'nu kuvi dá xee tú'ūn é kā'an Xúva kō tsi ntí'í kuétsi kō. ¹⁰ Lei e xtúvi ñá di'na ne, dōo ka'nu, ntá tsi veví'í ne, ña kánū ka vata kaa tú'ūn xee san. ¹¹ Tē dóo ka'nu kúvi da xtúvi ña lei é ña na'a ni idiá'vi ne, da dí'í dí'í ka ka'nu kuvi dá xee tú'ūn e ntíi dañu ntúvi kaidiá'vi.

¹² Nuu é ntaā i tsí iní nti tsí kuān koo kuvi. Dukuān é ntáka'an ntaá nti ni ntō. ¹³ Ñā ntáde ntí vatā o dé Muisee. Tsí Muisee ne, dávi nuu ña nuu ña dóo san vata koo é ña kiní ña Israeé san tsí kanainu kudii é kaxi'í nuu nuu ña. ¹⁴ Ña Israeé san ne, kúka'xi diki ña; ñá ntáñe'e diki ña. Kuan tsí ó ntee doó san nuu ña vata koo é ña kí'in diki ña da ntánakuā'a ña tú'un āta san e xtúvi Xuva ko ntā'a Muisee, tsí mii tsí Cristu kuvi ví'í ña naki'í ña doó san é ntee nuu ña vata koo é kí'in diki va'á ña. ¹⁵ Vata da e ntánakuā'a ña lei Muisee san veví'í ne, vatā ó te kanteé doó san nuu ña vata koo é ña kí'in diki ña. ¹⁶ Ntá tsi tē xoó ña'a xkokoō ñá ne, nakuntíkin ña Tó'o kō ne, naki'í ña doó san é ntee nuu ña. ¹⁷ Uun tsi Xúva ko ni Ēspíritū Sántū sán ne, xoo ñá'a é nuu Espíritū Xúva kō nima ñá ne, ntaíka xaa ña. ¹⁸ Un ntí'í ntí'í o é ña katavi núu ka doó san nuu ko ne, nāxi'í nuu ko vata koo é kīni ó Xuva kō nté kaa ña e dóo va'á ña. Dukuān ne, ntánadama ntí utén

uten é ntúvi ntí vata kaa Cristu, tsí utén utén kanata'xi ká ña kō e dóo va'á iña ña. Sá'ā é vē'xí nta'a Tó'o kō Espíritū Sántū san.

4 Dukuān ne, ña ntánatívi iní nti, tsi dóo vá'ā o dé Xuva kō da tá'xi ña tsiñu sá'a é ví'í nti. ² Nti'í ne, ñá ví'í nti uun nuu i é kīni kaa vatā ó de ña é kade xū'u, é kau'vi ña é ví'í ditó ña. Nā tē ntaéni nta'ví nti ña'a; ña ntánadama nti tú'un Xuva kō. Tsi nti'í ne, ntáka'an ntáa ntí ni ñá'a é nuu é ntaā i vata koo é kūtuni ntí'í ña tsí da mii tsí é vā'a e ntáde nti. Iní Xúva kō tsí nuu é ntaā i e ntáde nti. ³ Tē kuiní ña'a te dóo xū'u ntáka'án nti tú'ūn va'á san ne, ntá tsi ña te un ntí'í ntí'í ña, tsí mii tsí ña ntákunaá san é ña ntátekú ña tú'ūn e ntáka'án nti. ⁴ Tsí ña é ña ntákuinti'xe i Xuva kō ne, kūneé nuu ña. Tsi é ña vá'ā san é kadē kú'vé ñuxiví sa ne, ēdí nuu nuu ña vata koo é ña kiní ña tsi dóo va'á tú'ūn va'á san iñá Cristu, ña e dóo va'á. Tsí te kīni ñá Cristú ne, kiní ña nté kaa Xuva kō di. ⁵ Dā ntáka'an ntódo ntí ne, ñá te kuēnta iña mii nti ntáka'an ntódo nti, tsí kuenta iña Jesúcristu, tsí ña é Tó'o kō ña. Nti'í ne, kūdii ña ntáde tsiñu iña nto ntí kuenta iña Jesús. ⁶ Mii tsi Xuva kō, ña é de kú've é xi'í nuu ñu'ú san mí nēé san ne, ña tsi ña naxi'í nuu ña nimá nti vata koo é kuenta iña ñu'ú san ne, kutuni ko tsí dóo kaxi'í nuu ka'nu Xuva ko te kīni ó Cristu.

¿Nté koo kuntoo o e ntákuinti'xe ko Xuva kō?

⁷ Ntá tsi nuu i e dóo nuu a'vi e tá'xi Xuva kō ne, nuu kúnū nti.

Kūñú nti ne, vata kaa kídí é kudii nté'u kúvi, ntá tsi é nuu iní i ne, dōo nuu á'vi i vata koo é kīni ñá'a tsí ña te mī ntí kuvi víi nti, tsí Xuva kō é kúvi víi ña. ⁸Kuān te títín nuu i ntánto'o ntí ne, kūtíi nti. Kuān té ntánti'i iní nti nté koo víi nti, ntá tsi ió ka cho'o i nté koo víi nti, kuiní nti. ⁹Kuān te dōo ntántukū nuu iní ña'a san nté koo víi ña nī nti, ntá tsi ña kaxtuví mii Xuva kó nti, tsí kainuu mé'ñu kainuu dáva ña nti. Kuān te ntánantāva ña nti ñú'u kán, ntá tsi ña te ntáxi'i kue'én nti. ¹⁰Dā mí'i ka ntáñe'é nti ne, ntaíka ni'i ntí doxi'lí nti kuenta iña Jesúsú vata koo é kīni ña'a sán nti ne, kutuni ña tsí kantító Jesuu. ¹¹Dá ió ka ntuvi iñá nti ne, utén utén ntántuvi kuentá nti nta'a doxi'lí san kuenta iña Jesúsú vata koo é kīni ña'a tsí kantító Jesuu, tsi é ni'lí nti ntuvi vā'á iñá nti kuenta iña ñá, kuān te xi'lí kúñū nti. ¹²Dukuān ne, ntaxé'e nti kúñū nti dóxi'lí san vata koo é ni'i nto ntuvi iña nto.

¹³Ió mí ūve na'a tú'ūn é kākā'an ña é itúvi ntuvi dí'na, kākā'an ña: “Kuinti'xe kó ne, dukuān é kākā'án u”, ka'an ña. Nti'lí ne, dadíi kuinti'xe ntí ni ña tsikán ne, dukuān e ntáka'án nti dí. ¹⁴Tsí iní nti tsí Xuva kō ne, nantóto ña Tó'o ko Jesúsú dá xi'lí ñá ne, kuan koo nantóto ña ntí dí ne, dá nakí'i ña kó ni ntō, é kuntoo dadíi o ni ña. ¹⁵Uñ nti'í nti'í é ita ntí'xin ntí ne, e kúvi kuenta iña nto. Tsí tē kútítín ña'a naxnuu viko Xuva ko ña né, dōo kútítín ka ña'a nakué'e ña sintiá'vi nta'a Xuva kō ne, ka'an ñá tsi dōo ka'nu Xuva kō.

¹⁶Dukuān ne, ña ntánativi iní nti. Kuān té ntánativi kúñū nti, ntá tsi utén utén ntánaku'un vā'a nimá nti. ¹⁷Kuān té ntánto'o ntí vevíi ne, ntá tsi ñá tē nté sa ntii tū'un, tsí da kuíta nti'xin. Ntá tsi kani tú'un tsí diví é ni'lí nti ntuvi vā'á kue'en iñá nti nta'a Xuva kō é kutúvi ntii dañu ntúvi. ¹⁸Ntá tsi ña ntáde ntí kuenta nee e díto, tsí nee e díto san ne, ña te nguentúvi kaxntii; nee é ña díto san ne, diví é kaxntii ntii dañu ntúvi.

5 Kūñú kō é ió ñuxiví sa ne, vata kaa uun vi'i mí kuntoo taan ō kaa. Tē ntí'i kúñū kō ne, ini o tsí ntōo vā'a vi'i vā'á ko iña Xuva ko e dukún kán, mí kuntoo o ntii dañu ntúvi. Tsí ña te ña'a ni de vā'a ña, tsí mii Xuva kō de vā'a ña. ²Dá ntōo ká o ñuxiví sa ne, ntáxkoo kani ō e dōo ntio ko é kuntoo o vi'i vā'á kō é ta'xi Xuva ko tē xeé o nta'a ña e dukún kán. ³Nakū'ún o vi'i vā'á san é kūtavi núu o vata kaa du'nu vata koo é ña kunti'í nima ko te xi'lí o. ⁴Dá ntōo ká o ni kúñū kō ñuxiví sa ne, ntáxkoo kani ō tsi dōo ntánti'i iní kō. Ntá tsi ña te ntío kō é nakuíta o kúñū kō, tsí ntio ko kúñū xeé kō é ni'i ko nta'a Xúva kō. Ntio kō é nadama o ntúvi iña ko é kantí'i ntuvi iña ko é ña kantí'i ntii dañu ntúvi. ⁵Xuva kō de kú'v'e ñá ko kuēnta iña i sá'a: é ntio ñá é ni'lí ko ntuví va'á iña kó ne, diví ñá tá'xi ña Espíritu ña vata koo é koo ntaá ini ko é ni'i ko.

⁶Dukuān ne, ñá tē nguentuvi ntaíntée ini nti, kuān té kuví nti, tsí iní nti tsi dá ntōo ká nti ñuxiví sa ne, dōo ikā ntōo nti mí tuví Xuva kō. ⁷Ntá tsi ntaíka ntikín nti

Xuva ko, kuān te ña ntafíní ntí ña.
⁸Dukuān ne, ntaíntée ini ntí, kuān te na kuví ntí, tsi díf díf ka v'á'á ó te tsoo mii ntí kúñū ntí ne, dá k'í'fn ntí nta'a Xuva kō, kíkuntóo dadíi ntí ni ñā. ⁹Dukuān né, kuān te ntóo ká ntí ni kúñū ntí, kuān te tsoo míi ntí kúñū ntí ne, ntá tsi ntánti'i nuu iní ntí é víi ntí nēe é ntio Xuva kō. ¹⁰Tsí da mii é naxee o un ntíi ntíi o kuntāñi ó nuú Cristu vata koo é n'i' ko nee é dūku ntée o, te v'á'á ne, o tē ña v'á'a, vatā o de kúñū kō da intóo o ñuxiví sa.

Tū'un é ntuvá'a o ni Xuva kō

¹¹Dukuān ne, da xé iní ntí tsi dóo donchu'ví ide Xuva kō ne, ntánti'i nuu iní ntí ntáka'án ntí ni ñā'a te kuínti'xe ña ña. Ini Xúva kō nté ntaa ntí ne, ntio ntí é kūtuni ntó dī, te v'á'á ntí ne, o tē ña v'á'a ntí. ¹²Ñā ncho ka'an tūkū ntí ni ntō e dóo va'á ntí, ntá tsi ntio ntí é v'á'á kuini nto kuenta iñá ntí vata koo é kuvi nantiko koō nto e ntáka'an ñá'a, ña e dóo ka'nu kuiní i iña tuku ñā'a te v'á'a íto ña, ntá tsi ña ntáde ña kuenta te v'á'a nima ñá ne, o tē ña v'á'a. ¹³Tē ntákulukú ntí, kuiní nto ne, kuenta iña Xuva ko; te v'á'á ntí ne, kuenta iña nto. ¹⁴E dóo kuínima Cristú ntí ne, kade kú'vē ña ntuvi iñá ntí un tsi nte da kútuní ntí tsí mii ñā é xi'i ñá kuenta iña ko un ntíi ntíi o. ¹⁵Vata tsi tē kuédadii xi'i o ni ña un ntíi ntíi o, vata koo é xo'ō é ntóo ká o ne, ñá víi ka o é ntáde kueni mii ko, tsí vii o nee é ntio Xuva kō, tsí divi ñā xi'i ñá naa ko ne, ntá tsi ntoto xtuku ña kuenta iña ko. ¹⁶Vevíi ne, ña ntafíní ka ntí ñā'a nté ito ña vatā o dé ñā'a ñuxiví

sa. Kuān o íni ntí Cristu kídaa ñuxiví sa, ntá tsi ña kuán o kaíní ka ntí ña vevii. ¹⁷Dukuān né, te xōo ñá'a é kuvi uun tsi ña ni Cristú ne, é tūku ñá'a ntuvi ña ve. É itā ntí'xin é átá san ne, é ntūxée nima ñá vevii.

¹⁸Un ntíi ntíi nuu i s'á'á né, nta'a Xuva ko v'ē'xi, tsí divi ñā tá'xi ña é ntūv'á'a ntí ni ña kuēnta iñá Cristú ne, divi ñā tēe tsiñu ña ntí é k'á'án ntí ni ñā'a san é ntūv'á'a ña ni Xuva kō. ¹⁹Da xe é xi'í Cristu kuēnta iña kó ne, xé'e Xuva kō é ntūv'á'a ñā'a ñuxiví sa ni ñā, é ña dá'vi ká ña ña kuétsi ñā. Tēe tsiñu ña ntí é kué'é ntí é kūtuni ñá'a san nté koo ntuv'á'a ña ni ñā. ²⁰Ntí'í ne, nāā Cristu vé'xi ntí. Vata tsi te mii Xuva ko k'āka'an ña é ntáka'án ntí ni ñā'a kuenta iñá Cristú tē ntuv'á'a ña ni Xuva kō. ²¹Cristú ne, ña túvi kué'en tsi kuétsi ñā. Ntá tsi Xuva kō ne, dá'vi ña ña kuétsi ko ūn ntíi ntíi o dá xi'i ñá kuenta iña ko vata koo é ña kōo ka kuétsi kō ne, vii o é v'ā'a é ntio Xuva kō.

6 Ntí'i e ntáde tsiñu dadíi ntí ni Xuva kō ne, ntaíkan ntí nta'a nto tē ña te é ntaā i é n'i' ntó doméni e tá'xi Xuva ko ntō. ²Tsí Xuva ko k'āka'an ña tú'ūn é ntéé na'á san:

Ura v'á'a téku ko é k'āka'an;
 ntuvi dá nakáku ú o ne, xntii
 ú o,

ka'an ña. Vevíi ne, ura v'á'a; vevíi ne, ntuvi é nakakū ñá kō.

³Ñá te kaedí nuu ntí itsi é kuntikín ñá'a Xuva kō, tsí ña ntío ntí é k'ā'an k'ini ñā'a san kuenta iña tsiñu e ntáde ntí iña Xuva ko. ⁴Ñá'ā, tsí da nēe ka nuu i e ntáde ntí ne, ntáde ntí é v'á'a vata koo é

kūtuni ñá'a tsí nuu é ntaā i é kāde tsiñu ú iña Xuva ko da íni ña tsi ntákutíi ntí nimá nti kuān te dóo ntánto'o ntí, kuān te ntákunáa nteé nti, kuān te ió nuu i e dóo ntii tu'un. ⁵Tsí kutíi ntí nimá nti da káni ña ntí xo'o ne, tsu'un kutu ñā ntí vi'i utun, dā náataká nuu ña é ncho víi ña du'xen nī ntí, dā un vá'a tsi ntii dé tsiñu nti. Ntē ña ni kidí nti ne, intóo ntité nti dí. ⁶Kūtuni ñá da íni ña tsí ña ini dé nti é kīni kaa, tsí ini valá nti tú'un Xuva kō, tsi dóo ntákutíi ntí nimá nti, tsi ntáde nti é vā'á ni tā'an ntí, tsi é nuu Espíritū Sántū nimá nti, tsí kanīi nimá nti ntákuinima tá'an nti, ⁷tsi ntáka'án nti tú'un é nuu é ntaā í, tsi tá'xi Xuva ko ntii nti é kūvi víi nti. Da mii kuē'en tsi é vā'a e ntáde ntí da ntánāa nti kuenta iña tú'un Xuva kō, da ntánada'án nti kúñū ntí dí. ⁸Un vé'xi ne, dōo ntáde ka'nu ña'a sán nti; un vé'xi ne, ntánakuitā ñá nti. Un vé'xi ne, vā'á o ntáka'an ñá iñá nti; un vé'xi ne, ntáka'an kīni ña. Un vé'xi ne, ntáka'an ña tsí ña veté nti; ntá tsi nuu é ntaā i e ntáka'án nti. ⁹Un vé'xi ne, ntáka'an ña tsi ñá ini ñá nti; ntá tsi ña te da díi ña'a ini valá ña nti. Un vé'xi ne, dókō sa ntáxi'í nti; ntá tsi ntánakáku ntí, ntoo dukuān nti, ntaíní nto nti. Un vé'xi ne, ntánil'í nti é ntō'o nti; ntá tsi ña ntaé'ní kue'en ñá nti. ¹⁰Kuān te ntóo nta'xa nti, ntá tsi nguentúvi tsi dóo diní ñu'u nimá nti. Kuān te ntá'ví nti, ntá tsi dóo tītín ña'a ntáde kuika ntí ña. Kuān té ña tuví nee ió nti ne, ntá tsi é un ntí'i ió iñá nti.

¹¹Ntō'ó ta'an ntí, ña ñuú Corintú ne, e ntáka'án nti ni nto ntániī

nimá nti. ¹²Ñá te ntí'i é ña ntío ntí nto, tsí divi ntō é ña ntío nto nti.

¹³Kaka'án u ni nto vata kaa uva i'xa é káka'an ñá ni i'xa ñá ne, víi nto da xe'e, kuinima ntó nti dadii vatā o ntákuinimá nti nto.

**Xo'ō ne, vata kaa vi'i Xuva
ko mí tuví ña ntāa ō**

¹⁴Ñá ku kini nuu nto ni ñá'a, ña é ña ntákuintí'xe i Xuva kō, tsi ínté ntu koo kuntoo dadii é vā'á san nī é ña vā'á san? ¿Vá kāxi'í ntu é nēé san mí ió ñu'ú san dí? ¹⁵¿Nté ntu koo kudadii Cristu ni tó'ō e ña vā'á san? ¿Nté ntu koo kudadii ña kakuinti'xe i san nī ña é ña kákuinti'xe i? ¹⁶Ña kúvi kuntōo santu e ntúvā'a nāa ini ukún Xuva kō. Xo'ō ne, vata kaa uun xúkūn mí tuví Xuva kō, ña kantítō san, ntāa ō. Tsi mii Xuva kō ne, kaka'an ña:

Tuví u ni ñā ne, kaika ú ni ñā;
xu'ú kuvi ú Xuva ñā ne,
divi ña kūvi ña ña'a ko,
ka'an ña. ¹⁷Dukuān ne, kaka'an xtúku Xuva ko ni kō:

Ntii ntō mé'ñū ña'a san,
nakuntóo xio nto;
ñá ku tiin nta'a nto nēe é ña vā'a.

Kidāa ne, xu'ú nakuidó u nto.

¹⁸Kuvi ú Uva ntō ne,
kuvi nto i'xá ko dí,
ka'an Xúva kō, ña e dóo iō i é vīi.

7 Ntō'ó ta'an ntí e dóo ntio ntí ne, sá'a xe'é Xuva ko xū'u ña é vii ña. Dukuān ne, ntada ntoo tsi mii ō kúñu ko ni nima ko nee é kīni kaa. Kuiko ñu'u o Xuva kō, na ū'vi ko ña, tsi dóo ka'nu ña. Kada ntaa ntí'i ō nee é káka'an ña.

Kué'ē diu'un táxnūu ña doméni

8 Kuan vī'a vé, ntō'ó ta'an ntí, ntio ntí é kūtuni nto nté sa vá'ā o dé Xuva ko nī ña kuínti'xe i, ña ntánataká nuu ini ukún ñuú Macedonia. ²Tsí kuān te dóo ka'nu nuu i é ntánto'o ña ne, ntá tsi dóo diní ntoo ña; kuān te dóo nta'vi kue'en ña, ntá tsi dóo kue'e é xe'é ña doméni, vata tsi tē dóo iō iña ña. ³Xu'ú kantada ntaa u. Iní u tsí xe'é ña vata kaa é iō iña ñá ne, díí ka kue'é xe'é ña di, tsí mii ñá ntío ña é ku'e'é ña. ⁴Dōo ikan ñá da xe'e te ku'e'e ntí itsi é xntii ña ta'an kō ña ntáduku ntée Xuva kō di. ⁵Ne, díí ka kue'é edé ña vata kaa e ntantétu ntí, tsí ña te da míi tsi é xe'é ña iña ña, tsí di'na ntáda ñá kuenta kúñu ña nta'a Xuva kō ne, da ntáda ña kuenta ntá'a ntí di, vatā ó ntio Xuva kō. ⁶Dukuān ne, ntaíkáan ntí da xe'e ntá'a Tito te nainú kava nto ni ña tsiñu vā'a e xtúvi ñá di'na, natakā ñá nee e ntío nto kué'e nto. ⁷Divi ntō né, dōo vá'ā ó ntáde nto é un ntí'i é ntáde nto; tsi dóo vá'ā ó ntákuinti'xe nto; dóo vá'ā ó ntáka'an nto; dōo íni nto; dōo ntánti'i iní nto é vii ntó nēe e ntío Xuva ko ne, dōo ntákuinima ntó ntí vatā o nañé'e ntí nto. Dukuān ne, ntio ntí é koo ntii ntō é vā'á koo vii nto tsiñu sá'a di, e ntánii nima nto kué'e nto iña nto.

⁸Ñá te kataxnūu ú ntō é ká'án u ni ntō nté koo vií nto; mii tsi é ntio ko é kiní nto é vā'a e ntáde ña nguii san vata koo é kūtuni ntó tē nuu é ntaā i e ntánii nima ntó ntákuinima nto. ⁹Iní ntó tsi Tó'o ko Jesūcristú ne, dōo vá'ā o dé ña ni kō; dōo kade

ñá da xe'e. Divi ñá né, dōo iō iña ñá e dukún kán, ntá tsi tsóo mii ntí'i ña iña ña, e ntúnta'vi ñá kuenta iña nto, vata koo é divi ntō ne, nani'i nto e dóo nuu á'vi i kuenta iña ña.

¹⁰Ntá tsi é vā'á mii nto te kuínti'xe nto itsi ko é kāká'án u ni nto kuēnta iña núu i sá'a: Vá'ā ó te nainú kava nto tsiñu sá'a e dóo vá'ā o éni ntu'u ntō nte kuia ntí'i ko kán; tsí di'na nto éni ntu'u ntō; di'na nto ntío nto é vii nto. ¹¹Vi'a ve ne, kue'ēn ntó dā nté koo é nantí'i nto; ntánii nima ntó vií nto vata tsí o éni ntu'u ntō nte nuu i kan, kué'e ntō nee é iō iña nto. ¹²Tsí te ūun ña'a ntio ña é ku'e'é ntí'xe ña doméni nta'a Xúva kō ne, kanaki'i ña da nēe ka é iō iña ña. Divi ñá ne, ñá kaikan ñá nēe é ña tuvi iña ko.

¹³Ñá te kaká'án u te mii ntō tanúu nto vata koo é tuku ña'a kuntoo vá'a ña. ¹⁴Tsí kaka'án u tsí díí ka vá'ā ó te kudadii nto ni ñá. Vevii é ntekú ka iō iña ntó ne, xntii nto ña tē ntátaan núu ña; divi ñá né, xntii ña ntō da ntátaan núu nto di. Kidáá né, kudadii nto ni ña, ¹⁵vatā ó kaka'an tú'ūn é ūve na'á san: “Xoó ña'a é ku'e'é natāká ña ne, ñá ni ntōo ka iña ña; xoó ña'a é ña kué'e ni nataká ne, ñá ni kúnáa ntēe iña ña”, ka'an.

Tito ni ta'an ña

¹⁶Ntadiá'vi Xuva kō, tsí xe'é ña é kuan tsí ó kuvi nima Títo é kantí'i iní ña vata tsí ó kantí'i iní ko kuenta iña nto. ¹⁷Dōo xkúntee iní ña dá tsixe'ē ntí ña tē ncho ki'in ña, tsí mii ñá dóo ntio ña é kī'in ña mí ntoo nto.

¹⁸Taxnūu ntí uun ta'an ko nī Tito é dadii ki'in ñá ni ñá, uun ña'a e

dóo vá'a ntáka'an ñā ñu'u ini ukún san iña ñā, tsi dóo vá'a ó kaka'an ñā tú'un va'á iña Xuva ko. ¹⁹Ñá te da mii tsi sá'a, tsí ñā ñu'u ini ukún san nakaxnúu ñā ñā é káka dadii ntí ni ñā é xntii ñā nti é kuído ntí nēe e kintído ntí iña ñā ntátaan núu i san, vata koo é ká'an ñā'a san tsi dóo ka'nu Xuva kō, vata koo é kūtuni ñā tsi dóo ntio ko é xntii ta'an o. ²⁰Kí'in dādii ntí ni ñā, tsí ñā ntío nti é ká'an káni ñā'a kuenta iñá nti tsí ku'e'e e kintído nti. ²¹Dōo ntánti'i iní nti é víi nti nēe é vā'á kuenta iña Xuva ko ni ñā'á san.

²²Uun ká tuku ta'an kō táxnūu ntí ñā é kí'in dādii ñā. É kí'in ito iní nti tsí kade ntaa ñā é un ntí'i. Veví ne, díi díi ka ncho víi ñā tsiñu sá'a, tsí kanuu iní ñā tsi ntáde ntaa nto é un ntí'i dí. ²³Tē xoó ñā'a tsixe'e ñā nēe ñá'a Titó ne, ká'an nto tsí ta'an ko ñā, tsí dadii ntáde tsiñu ntí ni ñā kuēnta iña nto. Te katsixe'e ñā tā'an ko ñā nguú san ne, ká'an ntō tsí ñā ñu'u ini ukún san táxnūu ñā ñā, tsí divi ñā né, dōo ntaíko ñu'u ñā Cristu. ²⁴Dukuān né, nañe'ē ntó ñā tsí nuu é ntaā i e ntákuinima ntó ñā; nañe'ē ntó ñā tsí nuu é ntaā i é vā'á ñā'a nto, vatā o ntáka'án nti ni ñā, vata koo é kūtuni ntíi ntíi ñā'a, ñā ñu'u ini ukún san.

É xntii o ta'an kō

9 Ntá tsi ñā kantío nto é ká'an túku ú ni nto kuēnta iña i é xntii ta'an o, ñā ntántikin Xúva kō, ²tsí é iní u tsi dóo ntío nto é xntii nto tā'an nto. Dōo ka'nu kuíní ko é káka'án u ni ñā nto da kanií ñuú Macedonia tsí divi ntō, ñā ñuú Aca'yá ne, é iō tu've nto nte kuia

ntí'i ko kán é xntii ta'an ntō. Títin ñā ntio ñā é kuān koo víi ñā dí, tsi ini ñā tsi dóo diní nto e ntáde nto. ³Taxnúu ú ta'an kō san ve, vata koo é nāni'i é ntaā i é káka'án u iña nto kuenta iña núu i sá'a, te ntaā i é iō tu've nto, vatā ó kaka'án u ni ñā. ⁴Tsí te kúnteká u ñā ñuú Macedonia, kí'in ni'i ú ñā mí ntoo ntō ne, te vāta tsoo tú've nto doméní san ne, dōo kuka'an nuú nti e ntáka'an vétē ntí ni ñā kuēnta iña nto ne, divi ntō né, dōo kuka'an nuu ntó dí. ⁵Dukuān ne, kantio é kákán u nta'a ta'an kō sán te di'na ñā kí'in ñā, kíikoto ní'ni ñā nto te xntii ñā nto é tsōo tú've nto doméní san vata o xe'é nto xu'u nto dí'na. Kidāā ne, é iō tu've doméní san tē xeé nti, vata koo é ñā te dava ó ini nto, tsí mii ntō e dóo diní nto é ku'e'é nto.

⁶Sá'a nanū'u ntó iní nto: Xoo é ñā kue'e kaí'xi i ne, ñá ku'e'e kánani'i i dí; xoo é ku'e'e kaí'xi i ne, ku'e'e kánani'i i. ⁷É un é un nto ne, ku'e'e nto nēe e ntádē kuení nima nto é ku'e'é nto; ñá te kuētsi é kue'é nto, tsí Xuva ko kakuinima ñā xoo é kax'e'e i é dodíni i. ⁸Xuva kō né, kuvi ta'xi ñā é un ntí'i nēe é vā'a é ntio nto, vata koo é nguentúvi xee tá'an é un ntí'i iña nto, vata koo é xkōo ka iña nto é vii ntó da nēe ka tsiñu vā'a. ⁹Tú'un é úve na'a sán ne, du'vā ó kaka'an:

Dōo kue'e tsí'i ñā nta'a ñā ntá'ví san;

tsiñu vā'a é edé ñā ne, tuví ntii dañu ntúvi,

ka'an. ¹⁰Mii Xuva kō é káta'xi ñā tsíkīn i é kú'xí o é kúvi é ká'xi o ne, divi ñā tá'xi ñā é un ntí'i e ntántio nto é kú'xi nto. Mii ñā ntio

ña é kuē'nu dí vata koo é kuē'e ní'i kuenta iña tsiñú va'a é edé nto. ¹¹Divi ntō ne, un ntíí ntíí koo iña nto ve, vata koo é kuē'e tsi'i nto é kintído nti. Kídāā né, dōó titín ña'a nakué'e ña sintiá'vi nta'a Xuva ko kuēnta iña nto. ¹²Tsi dá kaxntii nto tā'an nto, ña ntántikín Xúva kō ne, ñá te da mii tsi é xntii nto ñā e ntátaan núu ñā, tsí nakué'e ña sintiá'vi nta'a Xuva ko kuēnta iña i e xntii nto ñā. ¹³É kuān ó ntáxntii nto ñā ne, ká'an ña tsi dóo ka'nu Xuva kō, tsí kutuni ña tsí nuu é ntaā i é ntaíko ñu'u nto tú'ün va'á iña Cristu, tsi ñá ni de víni nto iña nto é xe'é nto ña ni ün ntíí ntíí ña nguii sán dí. ¹⁴Divi ñā ne, ka'an ntá'vī ñá iña ntó dí e dóo ntio ña nto, tsi dóo vā'á o dé Xuva ko ni ntō e tá'xi ñā é vii nto é vā'á ni ñā. ¹⁵iNtadiá'vi Xuva kō tsi tá'xi ña uun doméni e dóo va'á kue'en, é ntē ña kuvi ká'an o nté kaa díí díí é vā'a!

É kadē kú've Pablu, tsí pustru ña

10 Xu'u é Pablu ú ne, ká'an ú ni nto kuēnta iña Cristú, divi ñā e dóo kakuinima ñá kō, e dóo vā'á o de ña ni kō. Xu'ú ne, tē dóo ntā'ví u dá itúvi ú ni ntō, kuiní nto, ntá tsi dá tuvi iká u ne, ñá kaū'ví ko é ká'an u ni ntō. ²Ká'an ú ni nto tē ña tsi'i ñú'ü ntó ko é vii ka'nu ú ni nto, iō ntó, tē náxeé u mí ntoo nto. Tē ña'á ne, kuān koo víi u ni da xōó ka ña'a iña nto e ntáka'an ña tsi ntáde ntí vatā ó ntio kúñū nti. ³Kuān te ntáde ntí du'xen é ntoo ká nti ní kúñū ntí ñuxiví sa ne, ntá tsi ña ntanáā ntí vatā o ntánāā ña ntoo ñuxiví sa. ⁴Tsí nuu i e ntánāā núu ni'i ntí san ne, ñá te iñá ñuxiví

sa, tsí nta'a Xuva ko vē'xi. Tsí Xuva kō né, dōó ntii iní ña é nantí'í ñá da nēé ka nuu i é kīni kaa, e dóo ka'nu. ⁵Da nēé ka e ntádē kuení mii ñā'a san é ña te nuu é ntaā í ne, da nēé ka nuu i é kā'nu ncho vii, é kaédí nuu itsi i é kīnī ña'a san Xuva kō; da nēé ka e ntádē kuení ñā'a sán ne, ntántada ntí kuenta ntá'a Cristu vata koo é na kuinti'xe ña ñā. ⁶É iō tu've nti é kué'é nti é nto'o da xōó ka ña'a, ña é ña kákuinti'xe i é kāka'an Cristu, te xee ntúvi é uun ito tsi kuinti'xe vā'a nto.

⁷Da mii tsi e ntaíto nto ña'a san nté ito ña. Tē xoó ña'a kaintée ini ña é káduku ntée ña Cristú ne, na vii ñá kuenta tsí ntí'í ne, ntáduku ntée ntí Cristú dí. ⁸Kuān te ntéku kudii é káka'an u kuenta iña tsiñú nti ne, ntá tsi ña kakuka'an nuú ko, tsí Xuva kō tá'xi ña tsiñú nti é xntii ntí nto vata koo é kuē'nu vā'a nto; ñá tē ntánakō'xó ntēé nti nto. ⁹Ñá te kataxnūu ú tutú san é ncho nau'ví u nto. ¹⁰Ntáka'an ñá'a tsi dóo ntii kaka'an u dá kataxnūu ú tutú san nta'a nto, ntá tsi da xe dóo ntā'ví ito u dá tuví dadii ú ni ntō, e dóo ntā'ví tú'ün ko, ntáka'an ña. ¹¹Ntio ko é kütuni ñá tsikan, tsí divi tsi é káka'an nti ni ñā da de vā'a ntí tutú san da intóo ikā ntí ne, divi tsi víi nti dí te nākuntóo dadii ntí ni ntō.

¹²Ñá ntio nti é ká'an ntí vatā o ntáka'an túku ña'a é ntánakate ntoo mii ña kúñū ñā. Ñá tē ntádē ntí kuenta te víi nti vatā ó ntáde ña. Tsí divi ñā ne, ntáde tuntu ña é ntáki'i kú've míi tsi ñā, é ntánantii ni'ni ta'an ña. ¹³Ntá tsi ntí'í ne, ñá víi ka'nu ntí nee iña é ña káduku

ntée nti, tsí mii Xuva ko kākā'an ña mí xee tá'an tsiñu e ntáde ntí ne, ña mí xee tá'xi ña itsi é xéé nti un tsi nte mí ntoo nto. ¹⁴Ñá tē ntaíta ntí'xin ntí mí é ntio Xuva ko é xéé nti, tsí Xuva ko kākā'an ña é xéé nti mí ntoo nto. Tsí di'na ntí xéé nti ñuú nto kán é xéé ní'li ntí tú'ün va'á iñá Cristu. ¹⁵Ñá tē ntáde ka'nu ntí ntáka'án nti kuenta iña tsiñu é edé tuku ñá'a é vata te ntí'í edé nti. Ntá tsi é ntio nti é díí ka vá'a koo kuinti'xe nto, vata koo é díí ka kue'e kada tsiñu ntí ni ntó, vata tsi ó kaka'an Xúva kō é víi nti. ¹⁶Kidāā ne, kuvi kí'fn ka ntí ñuú é díí ka ikā é ñuú ntó, kika'an ntódo ká ntí tú'ün va'á san. Ntá tsi ñá ncho náki'li núu ntí tsiñu é edé tuku ñá'a, vata koo é ña ká'an ñá'a tsi dóo ka'nu ña'a ntí, vata te ntí'í éni ntu'ū nti ntáde tsiñu ntí ikān.

¹⁷Tē xoó ncho kada ka'nu i ne, na kadā ka'nu ña kuenta iña Xuva ko. ¹⁸Tsí ña e dóo va'á nti'xe ne, ña te míi ña kakā'an ña e dóo va'á ña, tsí Xuva ko kākā'an ña e dóo va'á ña.

**Pablú ni ñá'a, ña é ña
té pustru ntí'xe**

11 Tē dí kütíi nto nima nto ní ko te ká'án u vata kaa uun ña tuntu. Na kütíi nto nima nto ní ko. ²Tsi dóo kakukuiñú ko nto, ña dokuñú é vē'xí nta'a Xuva kō, tsi é xe'é u xu'u ko é ntáda ú nto kuenta ntá'a Cristú ne, é kúvi nto vata kaa uun ñadi'í kuétsi, ña e dóo va'á, ña é vāta kiní ñatíi. ³Ntá tsi kadē kuení ko te kuān koo víi ña'a kani nta'ví ña nto vatā o dé koó san e kúvi dé tí éni ntā'ví tí Eva e dóo kí'in iní tí nté koo ka'an tí. Kidāā

né, xtuví mii nto e ntániñ nima nto e ntákuinima ntó Cristu, é da mii tsi ñá é kuinima ntó ña. ⁴Tsi nto'ó ne, dóo va'a ntácutíi nto nima ntó te da xóo ka ña'a xee ña e dóo kadaka nchu'ün é kākā'an ña iña Jéssu. Kuān té ña te kaká'an ña vatā ó ntáka'án nti ne, ntá tsi dóo diní nto ntánaki'li nto tuku espíritū é ña te ña Espiritu Xuva kō é nuu nima nto dí'na. Dóo va'a ntañi nto tuku nchu'un e dóo kadaka, é ña te ña tú'ün va'á iña Xuva ko e kí'li nto dí'na. ⁵Xu'ú ne, ñá te dutsi ká u é ña tsikan, ña e ntáka'an é ña ña é pustru, ña e dóo ka'nu. ⁶Kuān té ña kakuvi kaka'an vá'a ú ne, ntá tsi ini vá'a ú iña Xuva ko. É ini nto sá'a, tsi dóo ntánañ'é nti nto da nēé ka nuu i é edé nti.

⁷¿Ó dóo ntu kini kaa dé u é ña ni kí'li u xá'vi ko dá nakuā'a ú nto tú'ün va'á san iña Xuva ko, é ntunta'vi míi u dá káda ka'nu ú nto? ⁸Tsí kaido ú diu'un iña ñá ñu'u ini ukún xio ñuú é vata kaa te xā'vi ko vata koo é ña ña ntá'vi nto ko é xntii ú nto. ⁹Dā itúvi ú ni ntó ne, dóo táan nuu ko, ntá tsi nté uun nto ña ni ngunúu ú nto te xntii ntó ko é kátaan núu ko, tsí ta'an ko ña vé'xi ñuú Macedonía ne, xntii ña kó nēé é kátaan núu ko. Dukuān né, dóo dé u kuenta vata koo é ña natekú du'xén u ntó ne, kuān tsi koo víi u nguentúvi. ¹⁰Nuu é ntaā í vatā ó kaka'án u, tsí kantikín u Cristu. Kutuni Xúva kō tsi nté uun ña'a ña kuvi nakadí ña xu'u ko é ká'án u tsí ña ni kí'li u diú'un ntó da xntíi ú nto ne, kuān tsi koo ka'án u ni ña ntoo kaniñ ñuú Acayá dí. ¹¹¿Nté kui kuān ó kaka'án u? ¿Ó ña ntío ntu kó nto?

Ntá tsi Xuva kō ini ña tsi dóo ntio kó nto.

¹²Kuān tsi koo víi ka ú vatā o dé u, é ña kí'i ú xa'ví ko é edé tsiñu u, vata koo é ña kué'e u é víi ka'nu ña e ntáde tsiñu vatā o ntáde tsiñu nti. ¹³Tsí ña kuān ó ntáde sán ne, ñá tē dívi ñá é pustru é nuu é ntaā í ña, tsí da ti tsi ntaéni nta'ví ña ña'a e ntáka'an ña é pustrú Cristu ña. ¹⁴Ña túvi nee iña é da kudu'va kō, tsí mii tsí tó'o e ña vá'a sán ne, kaeni nta'ví ña'a é kánadama kúñu i é ntūvi vata kaa ánjē va'a. ¹⁵Dukuān ne, ñá tē neé ka'nu nuu i te ña ntáde tsiñu iña i ntánadama ña kúñu ñá é ntūvi ña vata ntáa ña ntáde tsiñu iña Xuva ko, ña e dóo va'a. Ntá tsi uun ntuvi ni'i ña é nto'o ña nta'a Xuva kō é kuān ó ntáde ña.

Da ntó'o Pablu da dé ña pustru

¹⁶Uun ito ká tuku ka'án u ni nto tē nté uun nto ña kadá kuení nto te kākulukú u. Te kuān o ntádē kuení nto ne, ntá tsi kiní nto nēe e ká'an ña lukú sa ni ntō, ña é kākaka'an míi, ña é kade ka'nu mií. ¹⁷É kuān ó kaka'án u ne, ñá te kakā'án u vatā ó ntio Xuva kō, tsí kaka'án u vatā ó kaka'an ña lúku, ña é kadē kuení i é ncho víi ka'nu. ¹⁸Da xe dóo iō ñá ncho kada ka'nu ñuxiví sa ne, xu'ú ne, kuān koo kada ka'nú u dí. ¹⁹Tsí nto'o e dóo ini ntó ne, dōo vá'a ó ntádē kuení nto ni ña lukú san. ²⁰Ntō'ó ne, dōo vá'a ó ntádē kuení nto ni tūku ñá'a, kuān te kátee tsiñu kuétsi ña nto, kuān te kánantí'yí ña nto, kuān te katíin ña ntō é víi nto é ká'an ñá, kuān te dóo ka'nu ncho víi ña ni ntō, kuān

te kaxe'é nuu ña vinuu nto. ²¹Xu'ú ne, kakuka'an nuú ko é ká'án u e ña kákene iní nti é kuān koo víi nti ni ntō.

Ntá tsi da nēe ka nuu i é ña kaú'ví ña é ká'an ña e dóo valá iña ñá ne, xu'ú dí ne, ñá kaú'ví ko é kuān koo ka'án u vatā ó kaka'an ña lukú sa. ²²Ña tsikán, ¿hebreu ntú ña? Kuān xu'ú dí, tsí ña hebreu ú dí. ¿Tátá Israee ntú ña? Xu'ú dí. ¿I'xá Abraan ntú ña? Dívi ú dí. ²³¿Ña kade tsiñu iña Cristu ntú ña? Xu'ú ne, díi díi ka dívi u é dívi ña, kuān te vata ó kaka'an ñá luku ú nee é kākaka'án u. Ntá tsi díi díi ka éde tsiñu u é ña tsíkan. Díi díi ka ki'in itō inúu kutú ú víi utun. Díi díi ka ki'in itō é'ni ña ko é ña tsikán ne, e dóo ki'in itō é dokó sa kaxi'í u dí. ²⁴Ú'un ito é'ni ña Israee san ko. Kāni ña kó xo'o. Oko xe'un kímí é uun ito xé'e ña ko. ²⁵Úni ito káni ña kó utun. Uun ito ká tuku ne, xuu káni ña ko. Úni ito nántatsin tun ntōo é kaxkani'i u nú ntute ñu'u kán. Uun ntuvi, uun niñu inúu nto'o u mé'ñu ntute ñu'ú san. ²⁶E dóo ki'in itō ñé'e ú ne, é dōo iní u tsi dóo donchu'vi nú ntute ka'nu sán ne, dōo donchu'ví nī ña du'ú dí; dōo donchu'ví nī ña ñuú ko é ncho ka'ní ña kó, nī ña tuku ñuú san dí. Iní u e dóo donchu'ví ñuú ka'nu san nī má kú'ú san, ni ntute ñu'ú sán dí ne, dōo donchu'ví ni tā'an ko, ña é ña te nuu é ntaā i e ntákuinti'xe i Xuva kō. ²⁷Dōo ntó'o ko é dé tsiñu ú ne, dōo ki'in itō ña ni kídí ú ne, dōo ntó'o ko e dóo kákin kó ne, dōo itsí ko ntute dí. Un vé'xi ne, ítúví ntité u ne, dōo ntó'o ko é ví'xin é ña tuvi dú'nú ko. ²⁸Uun ká tuku nuu i sá'a ne: utén uten dóo kaexnúu kó e dóo kantí'i

iní ko un ntíí ntíí ña ñu'u ini ukún san. ²⁹Tē xoó ña tuvi ntíí i ne, vata tsí ó kanto'o kó di. Tē xoó kakó'xo i uun nuu i ne, xu'ú e dóo u'vi kakúvi kó kuenta iña i. ³⁰Te kántio é káda ka'nu ú ne, kada ka'nu ú kuenta iña i é ña ni kuvi víí u é ña tuvi ntíí ko. ³¹Xuva kō, ña é Uva Tó'lo ko Jesūcristu, ña é kā'an o tsi dóo va'á ña ntíi dañu ntūvi ne, ña ña ini ña tsí nuu é ntaā i é kākā'án u. ³²Dā itúvi ú ñuú Damascú ne, ña odo nūú iña rei, ñá nani Āretá ne, tēe tsiñu ña ña é víí kuenta xí'í ñuú san é tññ ña ko é xnuu kutu ñā ko. ³³Ntá tsi ini xika núu ú, nanúu ñá ko ata ntó'o kán é kánti'u núu ñuú ñuú san. Dukuān né, ntíi ni'ni ú nta'a ña.

E xé'e Xuva kō é kīnī Pablu

12 É iní u tsí ña tuví neé kani'í ko é káda ka'nu u, ntá tsi xu'ú ne, ká'ān ú nee e tá'xi Xuva kō é kūtuní ko, é kīnī u di é vatā ó kuvi te kakénī ko. ²Iní u uun ña'a, ña e kuínti'xe i Cristú ne, é kūvi uxkimi kuíā e nádita ña ñā é xee ña é kuvi ūni é dukún kán mí tuví Xuva kō. Ntá tsi ña iní u te kani'í kúñu ña ñe'e ñá ne, o da mii tsi nima ña. Xuva ko ini ña. ³Iní u tsí ña tsikán ne, (kuān te kani'í kúñu ña, kuān té nima tsí ña ne, mii tsi Xuva ko ini ña) ne, ⁴nadíta ña ña mí e dóo vá'ā o mí tuví Xuva kō. Ikān téku ña tú'ūn e dóo xū'ú kaa, e dóo xii kaa, e nté uun ña'a ña kuvi ká'an ña é tēkú tuku ña'a. ⁵Kuenta iña ñá tsikán ne, kada ka'nu ú, ntá tsi ña kada ká'nu ú kuenta iña mií ko. Da mii tsi káda ka'nu ú kuenta iña i é ña ni kuvi víí u é ña tuvi ntíi

ko. ⁶Ntá tsi kuān te ntío ko kada ka'nu ú ne, ñá te vatā ó kaka'an ña tuntu ó kaka'án u, tsí da mií é nuu é ntaā i é kākā'án u. Ntá tsi ña kuān koo víí u vata koo e nté uun ña'a ña kadá kuení ña te dóo ka'nu u. Tsi é ini ña nté kaa u é tēkú ña nté o kaka'án u di. ⁷É ña ntío Xuva kō é káda ka'nu ú kuenta iña i e tá'xi ña é kūtuní ko é vā'a é iní u ne, tá'xi ña é kánto'o kó, vatā ó kuvi te iñu ni'ni ntído kúñu ko. Vata kaa iña é ña vá'ā san é kanantō'o ko vata koo é ña kuntekú ka é káde ka'nu u. ⁸E ūni ito ikán u nta'a Tó'lo ko te nāki'í ña é káde i é kánto'o kó san, ⁹ntá tsi kaka'an ñá nī ko: “Ñá'ā, tsi é xéé ó iña o e dóo kakuinimá ko o. Kutuni ñá'a tsi dóo ió ko é vii u é xntíí ú o ntuvi da ña tuvi ntíi o”, ka'an ña. Dukuān né, dōo diní ko é káda ka'nu ú kuenta iña i é ña tuvi ntíi ko vata koo é kūtuni ñá'a tsí ña'í Cristu e dóo iō ñá é vii ña. ¹⁰Dukuān ne, kaitúvi dīni u dá ña tuvi ntíi kó, da ntáka'an kīni ña'a san iñá ko di; dá kátaan núu ko, dá ntáde xení ña'a san ní ko, da nēé ka nuu i é kánto'o kó kuenta iñá Cristu. Tsi iní u tsí da ña tuvi ntíi kó ne, kídáa kata'xi Xuva ko ntíi ko é víí u.

E dóo kanti'i iní Pablu ña
ñu'u ini ukun ñuú Corintu

¹¹Xu'ú ne, kaka'an ntí'xe ú vatā ó kaka'an ūun ña tuntu é kade ka'nu mií ú kuenta iña mií ko. Ntá tsi ña'í kuetsí nto é kuān ó kaka'án u. Díí ka vá'a o tē dí ña'í nto ni ká'an ntó kuenta iñá ko. Tsí ña te díí ka dutsí u é vata kaa ña tsikán, pustru e dóo ka'nu ña'a ña, kuíni ña, kuān té ña váda kaidiá'vi ko. ¹²Tsi dóo kutíí ú

nima ko dá itúvi ú ni ntō ne, titín nuu i íni nto, nī dóxo kā'nu, vata koo é kūtuni nto tsí nuu é ntaā i é pustrú u iña Xuva ko. ¹³¿Mí'i ntū ña ni idé u dadíi ni nto vatā ó de ú nī ña ñu'u ini ukún xio ñuu? Ntá tsi kada ka'nu iní nto nī ko é ña ni natékú du'xén u nto é xntii ntō kó nee iña é kátaan núu ko.

¹⁴É iō tu've ko é kī'ín u, kíkoto ní'ni ú nto é kūvi uni íto. Ntá tsi ñá nateñu núu ú nto, tsí ña te iña nto e ntío ko, tsí mii nto é ntio kó nto. Tsí uva i'xá san, ña é dūku ntée é nātsoo vá'a ña iña ña é kūvi iña i'xá ña, ñá te i'xá ña é dūku ntée é nātsoo vá'a é kūvi iña ña. ¹⁵Xu'ú ne, dōo diní ko te nantī'i ú nee iña é iō iñá ko kuenta iña ntó, kuān té nte ntuvi iñá ko nantī'i ú vata koo é ñá ni nto nāni'i nto ntuví va'á iña nto. Ntá tsi dā díi díi ka ntio kó nto ne, ñá ni ntō né, vata te kantudutsí é ntio nto kó, kuini ko.

¹⁶Ini nto tsi nté uun nuu i ña ni nateñu núu ú nto. Ntá tsi iō ña'a ntáka'an ña tsi dóo iní u nté koo víi u é kūvi kani nta'ví u nto. ¹⁷¿Vá eni ntā'ví ntu ú nto nta'a ña e táxnūu u mí ntoo nto? ¹⁸Xu'ú ne, íkán ú nta'a Títo te kī'ín ña, kíkoto ní'ni ña nto mí ntoo nto ne, taxnūu ú uun ká tuku ta'an ko é kī'ín ñá ni ñá. ¿Vá eni nta'ví ntu Títo san nto? ¿Ñá ntu te dadíi tsi ntáde ntí ni ñá? ¿Ñá ntu te uun tsi nimá ntí ni ñá?

¹⁹Tē ntádē kuení nto tē ntánada'an ntí kúnū ntí nuu nto, dá kuān ó ntáka'an ntí ni ntō. Ntá tsi ña te kuan ō. Tsí ntí'í ne, nuu Xúva ko ntáka'an ntí e ntántikín ntí Cristu. É kuān o ntáka'an ntí ni ntō ne, vata koo é xntii ntí nto e díi ka

kue'nu nto te kutú've nto iña Xuva ko. Tsí ñá ni ntō tá'an ko e dóo ntio kó nto. ²⁰Kadē kuení ko nté koo kuvi te nāni'i ta'an ko: tē ña víi nto vatā ó ntio kó, tē ña víi u vatā ó ntio nto dí. Kadē kuení ko te iō ña é nāa núu ña, te iō ña é kūne'u iní ña, te kūdiin ñá dí, tē ntio ña é víi mii ñá kuenta iña mii ñá, te ká'an kíni ña iña ta'an ñá, te ká'an véte ña, te káda ka'nu ña, te kuān sá koo víi ña da nēé ka é ntio ña. ²¹Kaū'ví ko tē dá kī'ín xtúku ú mí ntoo nto ne, ta'xi Xuva kō é kūka'an nuu xtukú ko kuenta iña ntó, te kutúvi nta'xa ú kuenta iña ntó, iō ntó, ña e dóo iō kuetsí i nte dí'na. Váta nātivi iní ña e dóo dé ña nuu i é kíni kaa, e dóo dé ña é kíni kaa ni ñadí'í san, é edé ña da nēé ka é ntio nima kíni kaa ña.

Nté koo víi ña

13 E sá'a kūvi uni íto é kī'ín u, kíkoto ní'ni u nto. Kaka'an tú'un Xuva kō: “Tē xoó ntio i é tsí'i kuetsí uun ká tuku ña'a ne, da mií é kántio uvi, uni ña'a é ntáda ntaá ña”, ka'an. ²É káka'an u ni ñá é iō kuetsí i di'na, nī é un ntí'í ntí ña nguii san dá ñe'é u é kuvi ūvi íto ne, kuān te ika túvi u mí ntoo nto vevii, ntá tsi ká'an u vata tsí o é káka'an u dá kixkoto ni'ni u nto é kuvi ūvi íto ne, te kī'ín xtúku u mí ntoo nto ne, ñá ntuntā'ví ini kó ña; da mií é nantō'o ú ña. ³Kidáa kutūni nto tsí nuu é ntaā i é káka'an u naá Cristu. Ñá ni ntō, tsí dóo iō ña é víi ñá ni ntō. ⁴Ini nto tsí dā xi'i ñá ntiká krusí ne, vata te ña tuvi ntí ña, ntá tsi xe'é Xuva ko ntíi ña é ntōto xtuku ña ne, kantíto

ña vevii. Ntí'í ne, ña túvi ntii ntí dī, vata kaa ña é ña tuvi ntí ña kídaā dá xi'í ña, ntá tsi dā kúdadii ntí ni ña ne, kata'xi Xúva ko ntii ntí vata koo é vā'á koo víi ntí kuenta iña nto.

⁵Kadā kuení mii nto te vā'á o ntákuinti'xe nto. Koto ntee mii nto. ¿Ñā ntu ntácutuni nto te tūví Jesucristu ni ntó, o ñā ntu te nuu é ntaā i é iña ña nto? ⁶Ntio ko é kūtuni ntó dī tsí ntí'í ne, nuu é ntaā i é ntántikín ntí Cristu.

⁷Ntáka'an ntā'ví ntí ni Xuva ko vāta koo é ña víi nto nuu i é kīni kaa. Ñā te kuān o ntáde ntí kuenta iña mií ntí, vata koo é kā'an ña'a tsi dóo vā'ā o nakua'á ntí nto, ntá tsi ntio ntí é vā'á koo víi nto, kuān te ña ni idiá'vi ntí, kuiní ña'a san.

⁸Ñā kúvi nakuítá ntí nee é nuu é ntaā i. Da mii é víi ntí kuenta iña i é nuu é ntaā i. ⁹Dōo diní ntí tē ña kantio é ntí'í koó ntii ká ntí, tsí dīvi nto kūvi víi nto é un ntí'í. Ntáka'an ntā'ví ntí iña nto

vata koo é vā'á koo víi kue'en nto. ¹⁰Taxnūu ú tutú sa'a dī'na dá kī'ín u mí ntoo nto vata koo é ña kantio é kāda tii ú ni nto te kī'ín u. Tsí tsiñu e tá'xi Xuva kō é víi u kuenta iña ntó ne, ñā tē é nakō'xó u nto, tsí víi u é xntii ú nto é kuē'nu vā'a nto.

¹¹É nantí'í u é kāka'án u ni nto, tá'ān kó ne, ká'ān ú ni ntó é vā'a vā'a tsi koo kuntōo nto. Ntuku nto nēe e vā'a ntuvi iña nto. Ka'nu tsi víi nto nima nto. Uun tsi kadā kuení nto ni tā'an nto ne, vā'a tsi koo kuntoo nto ni tā'an nto. Kidāā né, Xuva kō, ña é tā'xi é kuntōo vā'a o, é kuinima tá'an ko ne, kunūu mé'ñu kūnuu dava ña nto. ¹²Kué'e ntō ntiusi tá'an nto. ¹³Un ntí'í ntí'í ña ntántikín Xúva ko taxnūu ña ntiusi nto.

¹⁴Tō'ó ko Jesūcristú na tā'xi ña nto é vā'a. Xuva ko na kuinima ñá nto. Espiritū Sántū sán na kunūu mé'ñu ña nto ūn ntí'í ntí'í nto. Kuan tsi koo é kā'án u ni ntó.